

ጳውሎሲ ፕልሞናስ ጳፊዳ ኪታ ጊዶ ቆፋ

ፕልሞናይ ዳር ኤሬቲዳ አማኒዛዴ፤ ኢዚ ቆላሲያሴ ዋሳ ኬፋን አማኒዛ አሳ ጋርሳን ዲዛዴ ሚሳቴስ። ፕልሞናስ እናስሞሳ ጌቴቲዛ አይሌይ ዴስ፤ ሄሳዴይ ባ ጎዳ ሶፔ ቤቴ ቢዲ ቃሾ ኬፋን ዲዛ ጳውሎሳራ ጋጊዴስ፤ ኢዚ ጳውሎሳ ባጋራ አማኒዴስ። ጳውሎሲ ፕልሞናስ ጳፊዳ ኪታይ ፕልሞናይ ሲሚዲ ኢዛኮ ቢዛ ሄ አሳንቻዛራ ማቃይናና ማላ ቆፍሴስ። ቃሴካ እናስሞሲ ሃኢ አማኒዳዴ ጊዲዳ ጊሻስ ሃይሳፌ ጉዬ ፕልሞናይ አማኖን ባስ ኢሻ ማላ ኤካናፔ ኦቲን አይሌሶ ቆዶንታ ማላ ዮቴስ።

ሃ ማጻፋይ ኦይኪዳ ኩሜሳ ቆፋ

ጌሎሶ 1-3

ፕልሞናስ ጳውሎሲ ሺሺዳ ቃላታ 4-7

ጳውሎሲ እናስሞሳ ጊሻስ ሺሺዳ ሚኖ ዋሳ 8-22

ኩሻ ቆፋ 23-25

¹ ዬሱስ ኪርስቶሳ ጊሻስ ቃሼቲዳ ታፔ ጳውሎሳፔኔ ኑ ኢሻ ጸሞቶሳፔ ኑ ሲቆ ኢሻ ጊዲዲ ኑናራ ኢሲፌ ኦሊዛ ፕልሞናስ።

² ኔ ኬፋን ሺቂዛ አማኒዛ አሳሲኔ ኑ ሚቼዮ አምፒብያስ ቃሴካ ኑናራ ኢሲፌ ኪርስቶሳ ዋታዳራ ጊዲዳ እርኪጳሴስ።

³ ኑ አዋ ጸሳፌ ኑ ጎዳ ዬሱስ ኪርስቶሳፔ ኪያቴሊኔ ሳሮቴሊ ኢንቴስ ጊዶ።

ፕልሞና ሲቆኔ አማኖ

⁴ ታኒ ታ ዋሳን ነና ቆፓሼ ኡባ ዋዴ ጸሳ ጋላታይስ።

⁵ ጋሶይካ ኔ ጸሳ አሳ ሲቂዛይሳኔ ጎዳ ዬሱስ ኪርስቶሳን ኔ አማኒዛይሳ ታ ሲያዲስ።

⁶ ኑኒ ኪርስቶሳስ ጊዲዳይሳኔ ኑስ ዲዛ ሎኦ ዮኑይ ወሪ ቆንጨን ኤሬታና ማላ ኔኒካ ኔ አማኖ ሃራ አሳስ ቤሳና ማላ ታ ኔስ ሚና ዋሳይስ።

⁷ ታ ኢሻዘ! ኔ ሃኖን ጸሳ አሳ ዋዚናይ ኦራጺዳ ጊሻስ ኔ ሲቆይ ታ ዋዚና ኬሂ ሚንሊዴስ።

እናስሞሲ ፕልሞናኮ ሲማና ማላ ጳውሎሳ ዋሳ

8 ሄሳ ጊሻስ ኔ ኦፋናስ ቤሲዛይሳ ኦፋና ማላ ኔና ኣዛዛናስ ታስ ኪርሰቶሳን ጸላቴሉ ዳሲኮሺን።

9 ጊዲኮካ ታ ኔና ኣዛዛናፔ ሲቆራ ዋሳይስ፤ ጋሶይካ ታኒ ዬሱስ ኪርሰቶሳ ጊሻስ ቃሼታዳ ቃሹ ኬላን ዲዛ ጳውሎሳ።

10 ታ ኔና ዋሲዛይ ታኒ ቃሹ ኬላን ዳሼ ዬሱስ ኪርሰቶሳን ዬሊዳ ና እናስሞሳ ጊሻሳ።

11 እናስሞሲ ሃይሳፌ ካሴ ኔና ጎኢቤና ሺን ሃኢ ጊዲኮ ኢዚ ኔናካ ታናካ ጎኢዛዴ። *

12 ታ ሃኢ ኢዛ ኔኮ ዛራ ዬዲዲስ፤ ታኒ ኔኮ ዬዲዛይ ኢዛ ጊዶንታ ታ ዋዚና ኔኮ ዛራ ዬዲዛ ማላ ቆዳይስ።

13 ሚሺራቾ ቃላ ጋሶን ታ ሃን ቃሼታ ዲሺን ኔ ታና ኦላ ማዳናይሳ ኢዚ ታናራ ዴኢዳኮ ታና ኡፋይሴስ።

14 ጊዶ ኣቲን ኔ ሎኦ ኦሶይ ኔ ዶሳንፔ ኣቲን ዋልቃራ ጊዶንታ ማላ ጋዳ ኔና ኦይቾንታ ኣይኮካ ኦፋና ኮያቤኬ።

15 እናስሞሲ ሃና ጋካናስ ኔፔ ጉፋ ዋዴ ሻኬቲኮካ ኦኔ ኤሪዛይ ሃይሳፌ ጉዬ ኡባ ዋዴ ኔናራ ዳና ዳንዳዬስ።

16 ሃይሳፌ ጉዬ ኢዚ ኔናራ ዳናይ ኣይሌ ማላ ጊዶንታ ኣይሌፌ ኣጲ ኔስ ኣሾ ኢሻ ማላ ጊዳና፤ ኢዚ ታስ ዶሴቲዳ ኢሻ፤ ጊዶ ኣቲን ኢዚ ኔና ኦላ ጎኣና ኣስ ጊዲዳ ጊሻሲኔ ኢዚ ኔስ ኪርሰቶሳ ባጋራ ኢሻ ጊዲዳ ጊሻስ ኔስ ኬሂ ዶሴቲዳዴ ጊዳና።

17 ኦስ ዲዛ ኢሲፌቲፋ ጋሶን ኔ ታና ኔስ ኢሻ ማላ ቆዲዛ ጊዲኮ ታና ኔ ሞካ ኤኪዛ ማላ ኢዛካ ሞካ ኤካ።

18 ኢዚ ኔ ቦላ ጋሊዳ ቆሆይ ዲኮ ዋይኮ ኔ ኣጮይ ኢዛ ቦላ ዲኮ ኢዛ ኣጮዛ ታ ቦላ ቆዳ።

19 ሄኮ ታ ጳውሎሲ፡ «ኢዛ ኣጮዛ ታ ኔስ ቃንጸና» ጋዳ ታ ኩሼራ ጸፋዲስ፤ ጊዲኮካ ኔ ኪርሰቶሳ ኣማኒዳይ ታ ባጋራ ጊዲዳ ጊሻስ ሃራይ ኣቶሺን ኔካ ታስ ቃንጸና ኣጮይ ዲዛዴ ጊዲዳይሳ ታ ኔና ኤሪሳናስ ኮሼና።

20 ሂኣ ታ ኢሻዞ! ሄሳ ሎኦ ኦሶ ኔ ታስ ኦፋና ማላ ጎዳ ሱንላን ኪርሰቶሳ ጊሻስ ጋዳ ኔ ታ ዋዚና ሼምፒሳና ማላ ታ ኔና ዋሳይስ።

21 ታ ኔስ ሃይሳ ጳፊዳይ ኔ ታስ ኣዛዜታናይሳ ኣማናዳኮ! ታ ኔና ኦይቹዳይሳፌ ኔ ኣፋ ኦፋናይሳ ታ ኤራይስ።

1:10 ቆላ 4:9 * 1:11 እናስሞሳ ጉሲ ጊሪኬ ቃላን ጎኢዛዴ ጉሳ።

²² ጸሲ ኢንቴ ዎሳ ሲዪዲ ታ ኢንቴኮ ባና ማላ ታስ ሂዶታይ ዲዛ ጊሻስ ታ ባዳ ኢንቴኮን ሽምጋናሶ ሃያና ታስ ጊጊሳ።

ዉርሴላ ሳሮካ

²³ ዬሱስ ኪርስቶስ ጋሶን ታናራ ቃሼቲዳ ኤጳፊራይ ኔና ሳሮ ጌሰ።

²⁴ ሄሳሶካ ታናራ ኦሊዛይቲ ማርቆሲ ኣርሲጺሮኮሲ፥ ዴማሲኔ ሉቃሲ ኔና ሳሮ ጌቴሰ።

²⁵ ጎዳ ዬሱስ ኪርስቶስ ኪያቴሊ ኢንቴናራ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b